



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorm Omnium Generalium Et Provincialium Collectio Regia

Ab anno MCXVIII. ad annum MCLXXIX.

Parisiis, 1644

Concilium Trevirense In Causa Sanctae Hildegardis abbatisae in monte
sancti Ruperti celebratum anno Domini MCXLVIII. tempore Eugenii papae
III.

urn:nbn:de:hbz:466:1-15588

ANNO
CHRISTI
1148.

custodes librorum asserunt, studiosè quæsitus primus quaternio non potuit inueniri. Propter quod propositi nostri est in Franciam destinare ad monasterium cuius abbas extitit qui eundem librum composuit: & si recuperare poterò, transcribi facere codicem totum, & mittere vobis. Credo enim quod vestræ inquisitioni sufficere debeat, vt cognoscatis, quæ, quemadmodum, quare sint condemnata.

Haëtenus Gaufredi epistola ad episcopum cardinalem Albanensem.

**CONCILIVM TREVIRENSE
IN CAUSA SANCTÆ HILDEGARDIS
abbatissæ in monte sancti Ruperti celebratum anno
Domini MCXLVIII. tempore Eugenii papæ III.**

NOTA.

* *Concilium.*] Trithemius in chronico Hirsaugiensi anno millesimo centesimo quinquagesimo, *His temporibus*, ait, *Eugenius papa III. Treuerim venit cum octodecim cardinalibus, episcopis, & abbatibus multis, inuitatus ab Adalberone eiusdem ciuitatis archiepiscopo, qui papam cum ceteris qui aderant omnibus per tres menses in cibo ac potu ex propriis sumptibus copiosissime prouidit. Ibi papa Eugenius ecclesiam monasterii sancti Matihæ apostoli de nouo reparatam pridie Kalendas Februarii dedicauit. Synodum quoque tam episcoporum quam cardinalium & abbatum ibidem celebrauit, vbi Henricus archiepiscopus Moguntinus, & sanctus abbas Claraualis Bernardus ipsi summo pontifici mirabilia quæ Deus operabatur in famula sua Hildegarde montis sancti Ruperti confessoris abbatissa retulerunt. Quibus auditis papa attonitus, & rem diligentius inuestigare volens, Virdunensem episcopum Adelbertum cum aliis viris fide dignis misit ad sanctam Hildegardem, vt cum humilitate & mansuetudine, sine strepitu vel curiositate, quid rerum esset ab ipsa sciscitarentur. Qui cum ad monasterium, in quo degebat sancta virgo, deuenissent, & iuxta commissionem apostolicam, veritatem ab ipsa humiliter inquirerent, illa simpliciter quæ de se erant aperuit, & legatos cum scriptis & libris reuelatis sibi diuinitus dimisit. Quibus papa recognitis, volumina sanctæ virginis sibi transmissa coram cardinalibus, archiepiscopis, abbatibus, & omni clero publice recitari præcepit, & per se lectoris officio functus partem non modicam legit, per quæ omnium mentes in stuporem versa, ac voces in laudem Creatoris omnium excitatae sunt. Aderat ibi sanctus pater Bernardus, quo mediante summus pontifex cum ceteris monebatur omnibus, ne tam insignem lucernam silentio tegi pateretur, sed gratiã tantam, quam Dominus suo tempore manifestasset,*

Acta Concilii.

D d iij

ipse sua auctoritate confirmaret. Ad hac summus pontifex benigno favore consentiens, deuotam Christi virginem literis saluatoris uisitauit, in quibus ei licentiam auctoritate apostolica proferendi & scribendi quamque per Spiritum sanctum cognouisset gloriose concessit, eamque, ut sine timore reuelata sibi conscriberet, animauit: cuius epistola tenor fuit:

Epistola
Eugenii ad
Hildegardem.

*Eugenius episcopus seruus seruorum Dei dilectæ in Domino filie
Hildegardi præpositæ in monte sancti Ruperti salu-
tem & benedictionem apostolicam.*

MIRAMVR, o filia, & supra quam credi potest miramur, quia Deus nostris temporibus iam noua miracula ostendit, cum te Spiritu suo ita perfudit, quod diceris multa secreta videre, intelligere & proferre. Hoc a quibusdam ueridicis personis ita esse percepimus, qui se fatentur te uidisse & audiuisse. Sed quid nos dicere ad ista ualeamus, qui clauem scientiæ habentes, ita quod claudere & aperire possemus, & hoc prudenter facere per stultitiam negligimus? Congratulamur autem gratiæ Dei, congratulamur & dilectioni tuæ: & hoc te admonemus, ut scias, quoniam Deus superbis resistit, humilibus uero dat gratiam. Gratiam ergo, quæ in te est, per humilitatem serua & custodi: ita ut ea quæ in spiritu proferenda senseris, prudenter proferas, quatenus illud a Domino audias: *Dilata os tuum, & ego implebo illud.* Quod nobis de loco illo, quem tibi in spiritu præuidisti, significasti, hoc permissione & benedictione nostra & episcopi tui fiat, ita quod ibi regulariter cum sororibus tuis uiuas secundum regulam sancti Benedicti, sub eiusdem loci clausura.

Psal. 80.

Ad hac uirgo Christi summo pontifici literas responsales diuinitus inspirata remisit, in quibus eum de arcanis quæ habebat in corde suo admonuit, & diuinam circa hac uoluntatem & beneplacitum indicauit. Hæc Trithemius.

Ab soluto Rhemenfi Concilio, cum Eugenius papa Treueris morabatur, adeoque anno 1148. hæc contigisse testatur Theodorus abbas in uita sanctæ Hildegardis apud Surium tomo 5. die 17. Septembris: unde Trithemius hæc uerbo tenus fere descripsisse colligitur.